

Allannguutissatut siunnersuut

Uunga:

**Akileraaruserinermik ingerlatsineq pillugu Inatsisartut inatsisaata
allanngortinneqarneranik Inatsisartut inatsisissaattut siunnersuut**

Aappassaaneerneqarnissaanut Naalakkersuisunit saqqummiussaq.

§ 1-imut

1. Nr. 7-ip kingornagut normutut nutaatut ilanngunneqassaaq:

"**01.** § 40, imm. 9, imatut oqaasertalerneqarpoq:

"Imm. 9. Imm. 1-imiit 8-mut akileraarutinik taagorneqartunik taakkualu erniaannik tapiliussanullu akiliinngitsoortoqarnerani annaasat landskarsianit nammanneqassapput."

§ 2-mut

2. Imm. 2-p kingornagut immikkoortut nutaatut ilanngunneqassaaq:

"Imm. 3. Inatsisartut inatsisaanni § 1, nr. 8, pisassarisanut 31. decembere 2007-ip kingornqatigut akiligassanngortussanut atuuttuuvoq."

Siunnersuummut nassuiaatit

Nalinginnaasumik nassuiaatit

Siunnersuutip siunertaraa, akileraarutinik annaasanik Namminersornerullutik Oqartussat kommunillu avitsivigisartagaannik maannakkut aaqqissuussinermut atasumik allaffissornikkut annertuumik suliakkersorneqarnerup killilersimaarniarnissaa.

Siunnersuutip kinguneraa, pisassarisat 1. januar 2008-mi kingusinnerusukkulluunniit akiligassanngortut aallarnerfigalugit, innuttaasut suliffeqarfiilluunniit akileraarutinik akiligassatik akilersinnaanngikkaat paasineqarnerini annaasaqaatit landskarsip karsiata nammatassarissagai. Tamatuma sunniutaa tassaassalluni kommunit

aningsaasaqarnikkut iluaqutissinneqarnerat Namminersornerullutik Oqartussallu annertoqataanik aningaasanik annaasaqartut. Taamaammatt kommunit aningaasatigut iluaqutissinneqarnerat ataatsimoortumik kommuninut tapiissutit ilanngaaviginerisigut illuatungilerniarneqarpoq. Ataatsimoortumik tapiissutit, akiliisitsiniartarnermi suliaasat ataatsimuulersinniarneqarnerannut atatillugu, maannakkut KANUKOKA-mik isumaqatiginninniutigineqarneranni ilanngaanissaq sammineqartunut ilaavoq. Tamatumunngalu peqatigitillugu kommuninut akileraarutini kinguaattoorutit, tassalu kinguaattoorutit 1. januar 2007 sioqqullugu pinngorsimasut Namminersornerullutik Oqartussanit tiguneqarnissaat pillugu sinaakkutissat oqalliserineqarlutik.

Allaffissornermi suliakkersugaanerup killiliivineqarnerata saniatigut siunnersuutip nassataraa kommunit akileraarutini isertittamik tungaasigut qularnaannerusumik inissisimalernissaat. Maannakkut aaqqissuussinermi suliffimmik kommunimi pingaaruteqarnerusumik akiliisinnaajunnaartoqartillugu kommuni annertuunik annaasaqartariaqartarpoq. Kommunit ilaanni taamatut annaasaqarnerit naatsorsuutini amigartooruteqarnerannik kinguneqarsinnaavoq. Taamatut annaasaqarsinnaaneq siunnersuummi nunap karsianut, taamatut allannguuteqarnermik ajornanninnerusumik nammataqarsinnaasumut, nuunneqarpoq.

Aalajangersakkanut ataasiakkaanut nassuiaatit

Nr. 1-imut

Siunnersuutigineqarpoq isertitanik akileraarutinit tunngasutigut annaasaqaatit, tamakkununngalu ernialiuksanik tapiissutinillu annaasat, landskarsimit annaasaqaatatinneqassasut.

Siunnersuummi pineqarput § 40, imm. 1-imiit 8-mut taagorneqartut akileraarutit tamarmik, tamatumani aamma nunamut tamarmut, kommunimut, kommuninullu ataatsimoortumik akileraarutinit, iluanaarutisianiit akileraarutinit, ingerlatseqatigiiffiit akileraarutaanniit il.il. annaasaqaatit.

Nr. 2-mut

Annaasaqaatinik avitsisarnerup allanngortinneqarnera, pisassarisanut 31. december 2007-ip kingornagut akilerneqartussanngortussanit annaasaqaatinut atuutilernissaa siunnersuutigineqarpoq

Taamaasilluni pisassarisat 1. januar 2008 nallertinnagu akilerneqartussanngortussanik agguvaassisarneq aallaaviummik maannakkutut malittarisassat malillugit ingerlaannassaaq.